

Khalifah Kerajaan Bani Abbasiyyah yang kelima ialah Harun ar-Rasyid bin Muhammad al-Mahdi. Dia dilahirkan di Rayy pada tahun 145 Hijrah. Semasa mudanya, dia telah dilantik oleh bapanya untuk melakukan tugas-tugas penting dalam pentadbiran negara. Dia dilantik menjadi khalifah pada tahun 170 Hijrah ketika berusia 25 tahun iaitu pada hari wafat saudaranya, Khalifah al-Hadi.

Khalifah Harun ar-Rasyid adalah seorang yang cenderung dalam hal agama, mengamalkan sembahyang seratus rakaat setiap hari dan mengerjakan ibadat haji sebanyak sembilan kali serta sentiasa menerima nasihat orang-orang bijak pandai terutama ahli-ahli agama. Khalifah Harun ar-Rasyid adalah seorang yang bersifat pemurah dan sentiasa bertimbang rasa terhadap orang miskin. Dia sentiasa mengambil berat tentang urusan pemerintahannya dan selalu memimpin tenteranya dalam peperangan. Sebab itulah dia sangat dikasihi dan disegani oleh rakyat. Dia juga seorang yang tabah dan sangat tegas terhadap musuh. Selain itu, dia juga suka mendengar syair dan qasidah.

HUBUNGAN DIPLOMATIK

I. Golongan 'Alawiyyin

Khalifah Harun ar-Rasyid berhasrat untuk memperbaiki kembali hubungan antara Kerajaan Bani Abbasiyyah dengan golongan 'Alawiyyin. Tetapi golongan 'Alawiyyin menolak dan tetap melakukan pemberontakan di Dailam yang dipimpin oleh Yahya bin 'Abdullah bin Hasan bin 'Ali Khalifah Harun ar-Rasyid pun mengutus Fadhl bin Yahya al-Barmaki untuk menentang mereka. Sebelum berlaku pertempuran, Fadhl berjaya memujuk Yahya untuk menerima perjanjian damai. Untuk menguatkan jaminan damai

ini, Khalifah sendiri menulis surat kepadanya serta memberi hadiah-hadiah yang bernilai. Yahya menerima jemputan khalifah ke Baghdad dan pada masa itu dia ditangkap.

Saudaranya, Idris bin 'Abdullah bin Hasan bin 'All pula melarikan diri ke Mesir dan terus ke Maghribi (Morocco) dan mendirikan Kerajaan 'Alawiyyin yang pertama dinamakan Daulah al-Adarisan atau Daulah al-Idrisiyyah pada tahun 172 Hijrah bersamaan tahun 788 Masihi. Dalam usaha untuk menghapuskan pemberontakan Idris, Khalifah Harun ar-Rasyid mengutus Sulaiman bin Jarir. Sulaiman berpura-pura memperhambakan diri kepada Idris bin 'Abdullah dengan menzahirkan kebenciannya kepada Bani Abbas hingga dia dikasihi oleh Idris. Ketika inilah Sulaiman memasukkan racun ke dalam makanan Idris yang menyebabkan Idris meninggal dunia, Idris telah diganti oleh anaknya yang juga bernama Idris yang ditinggalkannya ketika masih dalam kandungan.